

平定粵寇紀略

一
函
十
三
冊
函

平定粵寇紀畧卷五

咸豐六年丙辰正月江南軍敗竄賊於倉頭鎮

瓜州賊屢出衝突金陵賊首遣大隊助之托大臣
檄副都統德興阿都司趙樹棠屢敗之於土橋虹
橋尹家橋瓜州賊不敢復出金陵賊亦受創去初
金陵賊糾合上游來賊以數萬計由陸路嘯聚於
倉頭鎮聲勢頗壯余提督萬青虎總兵嵩林等分
途抄殺賊鋒不可止遏張總兵國樑奮銳摧其中
堅截賊不能首尾顧各軍乘之俘斬數千賊始潰

圍遁去

皖軍克復舒城縣

廬州復後和提督會商福巡撫以南路舒城東路
巢縣皆賊久踞爲廬郡腹背患宜分兵攻之和提
督與總兵郝光甲珠克登等赴舒城分門攻擊已
革總兵音德布首先由東門登城各軍掩殺斃賊
三千餘名縣城立復總兵鄭魁士等原議攻柘臯
以趨巢縣者是日先擊三河踞賊僅獲小勝未得

長驅

二月楚南援師克復江西萍鄉縣

時江西賊勢猖獗瑞州臨江未復吉安府復於正月二十五日被陷湖南邊界均戒嚴候選道劉長佑時在江西統兵勇回湘援勦由醴陵進攻萍鄉二月十一日有黃衣賊目自葡萄口出撲我軍圍之數重賊目入民舍自焚死諸賊乘夜鼠竄遂復縣城

楚南軍擊破吳城賊復建昌縣

賊踞吳城復陷建昌縣曾侍郎以水師之在吳城

者無陸軍依助恐致挫失遣都司黃虎臣率三營步兵馳赴吳城相機進剿二月二十二日賊出數千人逼沙洲河而陳水師哨官許志清突陣被刺獲救免虎臣乃分軍二隊一繞其後一背水出其前鼓勇夾擊我軍始振水師亦轟礮助勢遂大破賊眾追至建昌縣賊開門遁收復其城

三月瓜州鎮江賊合攻揚州城陷之旋爲官軍收復咸豐三年六月都司劉廷鏌援鄧提督紹良於丹陽復獲勝於辛豐鎮遂至鎮城扼守賊不敢南向

者二年廷鏌旋戰死賊乃猖獗附鎮城江中水營
二一總兵周士法部浙艇泊焦山一總兵陳國泰
部粵艇泊金山皆高檣巨舶非大風不能行非料
量帆樯數時不得動故瓜鎮之賊往來金焦間晏
如也二月杪鎮江賊渡江糾合瓜州賊突然內犯
金陵賊首又撥大股助之三月初一日復陷揚州
城知府世焜參將祥林力戰捐軀托大臣兵潰退
保北路副都統德興阿帶馬隊衝突遏賊北竄賊
乘間撲東路萬福橋意圖擾及裏下河賴總辦糧

臺江甯布政使今直隸總督文煜帶勇擊退

詔革托大臣及幫辦提督陳金綬前侍郎雷以誠職加
德興阿都統銜爲

欽差大臣以在營之詹事府少詹事翁同書幫辦軍務
德大臣親督總管西昌阿等耀兵於揚城西北隅
破薛家樓撲營悍賊直擣中堅轉戰皆捷賊遂披
靡潰遁十三日收復揚州

布政使銜浙江甯紹台道羅澤南力攻武昌城死之
澤南湖南湘鄉縣諸生講學宗法程朱體用兼備

咸豐二年賊犯長沙卽應會侍郎之招倡率生徒
爲團練忠義至性感動鄰里遂率其鄉人殺賊於
兩湖江西大小二百餘戰克城二十所向皆以身
爲士卒先由訓導超擢浙江甯紹台道加布政使
銜上年八月自江西回援武漢轉戰而前十月始
與胡巡撫會師至是力攻武昌紮營賓陽門外之
洪山三月初二日乘勝追勦直抵城下左額中槍
子入腦至初八日因傷殞命事聞

上深加憫惻照巡撫例優卹之胡巡撫派澤南弟子記

名道安慶府知府李續賓統其眾

賊陷江浦縣踞浦口攻六合官兵擊卻之旋復浦口

江浦

揚城賊闌入江浦縣分股由寶鳳莊等處抄至浦口總兵武慶退保六合縣賊復隨攻之德大臣派總兵穆克登額督帶馬隊馳往協勦向大臣亦派總兵張國樑帶隊渡江來援駐六合之龍池賊由毛許墩焚掠而至國樑俟賊近單騎陷陣揮兵衝擊斬其酋餘黨望風而靡追至水家灣適留署六

合縣事知府溫紹原督民勇至合力攻勦斃賊一
千餘名賊竄浦口國樑會穆克登額武慶等追擊
又敗賊於葛塘集隨於十八日克浦口二十三日
復江浦縣

安徽甯國府失陷皖南賊氛復熾

賊爲皖浙防軍追勦復由太平涇縣犯甯國府三
月二十八日陷之竝竄廣德建平賊騎直薄紅林
橋且入浙境適總兵秦如虎馳至擊退而甯國府
城久爲賊踞鄧紹良新授浙江提督乃統軍萬餘

敗賊於東溪橋復潛師取七里墩直抵城下圍攻
半年餘始克復

四月楚軍督黃州練勇擊援賊於新洲敗之

江西省城頻告警會侍郎撥兵赴援其駐潯水陸
各軍僅得自衛九江賊上突湖北麻城縣至新洲
修寨築壘搜掠民糧爲牽掣武漢計眾約三萬官
大臣檄黑龍江營總多隆阿吉林參領額爾庫等
率馬隊會同黃州府知府許賡藻督集鄉團助剿
行至柳子港西岸賊於東岸列陣以迎馬隊從淺

水東渡將弁有被傷者裹創牆進賊不能禦紛紛潰退軍功吳之傑偵賊欲歸三店巢謂所屬勇曰楊汭河者三店必經之渡大軍馬隊破其前我當以民勇勝其後乃伏勇叢葦處賊果至泗水乘其不備槍礮齊施無虛發生擒僞檢點指揮將軍各一人長髮賊八十餘人進勦三店馬隊踵至圍斬無算毀其各壘未及新洲三十里賊棄寨遁追敗之於團風鎮驚公頸焚賊屯聚一空竝獲木牌二裝載而還

楚南軍克復江西東鄉進賢二縣會圍撫州府水師
克復豐城縣

賊踞樟樹鎮撫州被陷曾侍郎派兵分路往勦同
知李元度率留饒之軍取道東鄉會知縣吳朗帶
團勇於三月二十日克復縣城知府鄧輔綸同知
林源恩副將周鳳山趨進賢縣敗賊於羅溪三月
十二日克之會於東鄉二十七日乘霧攻撫州破
其對河賊壘五座四月初二日李元度督勇挽搭
浮橋賊以大股來撲兩軍相持間李元度念搭橋

劇難不若乘隙飛渡因合左營新中營用小划先
濟各哨繼之亦有解衣晁水者閱兩時畢渡連日
猛攻屢敗踞賊建昌來援之眾亦受創去第以城
堅賊多未能遽復記名道劉于濬帶水師二營防
上游瑞臨之賊因豐城被賊占踞四月初十日督
船往攻豐城一線單隄賊得隱避船礮不能及乃
於二十日初更三門放礮攻擊督帶哨勇登岸各
持火具燒其南門外賊壘賊疑陸軍已至向樟樹
鎮逃竄克復縣城軍氣爲之一振曾侍郎督兵江

右自塔提督病亡羅澤南援楚後軍中既乏健將
復闕厚糈竭蹶萬狀賴在籍刑部侍郎黃贊湯前
湖南知縣今浙江巡撫李瀚章爲之勸捐籌饟翰
林院編修郭嵩燾知府劉蓉爲之督隊攻勦疊著
戰功均以力辭保獎未登奏牘致無從編錄云

江蘇巡撫吉爾杭阿擊金陵援賊於高資力戰死之
吉巡撫至鎮江受幫辦軍務任慨然謂攻堅不如
斷糧野戰不如扼隘高資者賊運糧要道也飭候
補道江甯府知府劉存厚結三營於高資煙墩山

以扼之金陵賊大恐出賊數萬由句容會鎮江之
眾盡銳來犯存厚被圍知縣松壽鹽知事張翊國
均戰死六合頭旂帶勇官夏定邦列營高資之下
賊樹大旂於松林後誘之勇目金長慶率敢死士
十餘人奔往奪得其旂過松林伏起戰歿營亦旋
潰諸將官各圖保守不敢往援巡撫所統不及萬
人或說巡撫曰賊護糧而來生死所關鋒銳不可
當姑撤此營鎮江賊喜於得命必不我迫巡撫慚
然曰我以一部郎不數年位開府仗節麾受

國恩厚矣今一戰而捷賊糧必斷賊窟可平上解

聖主之憂下甦生民之困在此舉矣詎可避難趨易出
此退避之策乃率親兵小隊馳往救之衝入高資
營賊復四合巡撫登高瞭望中擡礮子驟斃存厚
左右衝突欲翼其尸出不克血戰死京口副都統
綳濶已戰脫哭曰吾與吉公偕入吉公死吾何忍
生亦自投江死後均奉

旨優卹吉巡撫謚勇烈綳都統謚勇節劉存厚謚剛愍
五月江南軍馳勦援賊於鎮江克之賊竄回金陵